

# A MAZZE E PIVEZE

Pe jucà ce vulève:

- **A MAZZE**, nu pizze de légne ritte e tunne, lunghe nu mètre
- **U PIVEZE**, nu pizze di légne de 15-20 cm chi duje late pendúte, fatte c’u curtille o c’a raspe.

Tutte e duje i pizze de légne venévene tagghjate, quase sèmba, da u maneche de ‘na scopa vécchje.

Partecipavene o juche duje o cchjù uagghiúne

Cúme se jucave:

- Se scegljève " 'a case" (u punde da ndò s’abbijave che ère quase semba u cuirchje da fughnatúre o de l’acquèdotte o se faceve nu fussetille pe ndèrre);
- Se menave u tucche pe vedè chi abbijave pe prime, chi ére u seconde e víja decènne;
- Se mettéve pe ndèrre u piveze e se déve ‘na botte c’a mazze sópe a vúne di ponde pe farle zumbà in àreje e, tramende che cadéve, n’ata bbotte pe farle jì u cchiù lundane pussibbele.  
Seccome u tire ére defficele, se putéve pruvà pe tre vote.
- U seconde jucatore jéve arrecoghje u piveze andò ére rrevate e u menave vèrse “‘a case”, cercanne de farle arrevà u cchjù vecíne pussibbele;
- Quanne u piveze se fermave sópe “‘a case” o a ‘na destanze cchjù corte d’a mazze, u jucatore devendave padróna d’a mazze e d’u piveze.

Se putéve devendà padróna d’a mazze e d’u piveze pure quanne se addevenave, lucculanne, u nnumere di mazze che ce vulévene p’arrevà “‘a case” da ndò ére arrevate u piveze.